

四庫全書

集部

欽定四庫全書

集部

清獻集

目錄  
卷一

詳校官庶吉士臣瑚圖禮

主事臣呂雲棟覆勘

覆校官博士臣劉光第

校對官原任中書臣徐步雲

謄錄監生臣沈安邦

欽定四庫全書

集部四

清獻集

別集類三 宋

提要

臣等謹案清獻集二十卷宋杜範撰範字成已黃巖人嘉定元年進士淳祐中官至右丞相清獻其謚也事蹟具宋史本傳史載範所著古律詩五卷今此本四卷又雜文六卷今此本亦四卷又奏稿十卷今此本十卷又多

書劄一卷又外制三卷進故事五卷經筵講義三卷今此本俱不載而有行狀本傳祠記等一卷列於卷首共為二十卷蓋後人重輯之本非其舊矣範有公輔才正色立朝議論鯁切其為御史時累劾李鳴復等行賄交結之罪鳴復卒以去位其守寧國還朝時又極陳內憂外患之交迫而勸理宗以屏聲色遠邪佞言多切摯及其為相前後所上五事及

十二事無不深中時弊雖在位未久而沒不能大有所匡正然奏疏之見於集者大都悱惻懇到足以徵其忠愛之忱矣乾隆四十三年五月恭校上

總纂官

臣紀昀陸錫熊臣孫士毅

總校官臣陸費墀

欽定四庫全書

清  
朝  
提  
要

欽定四庫全書

集部四

清獻集目錄

別集類三

宋

卷一

四言古詩

五言古詩

卷二

七言古詩

五言律詩

卷三

七言律詩

五言絕句

卷四

七言絕句

卷五

奏劄

卷六

奏劄

卷七

奏劄



卷八

奏劄

卷九

奏劄

卷十

奏劄

卷十一

奏劄

卷十二

奏劄

卷十三

奏劄

卷十四

奏劄

卷十五

書劄

卷十六

序

記

卷十七

跋

卷十八

祝文

祭文

卷十九

傳

卷二十

附錄

欽定四庫全書

清獻集卷一

宋 杜範 撰

四言古詩

三月某日有感而書

敏不可恃鈍宜自強詩酒荒嬉恐暴汝良我日衰情賴  
汝以張安肆日偷古訓洋洋我與伯氏短檠夜書矻矻  
待旦我所不如每一念之收涕痛乎嗣而昌之其後人  
歟

和訥齋題曉山亭

理粲萬象孰妙孰微卓彼南山目游心討露氣澄澈淨  
不容掃瑟瑟風松剪剪煙篠甘夢未覺一聲晨鳥恐隨  
賓送歲月空老整冠危坐抱膝自笑天際飛鴻健翮矯  
矯一念既徹何遠不到我卷我書豈其弗攷萬動紛起  
萬慮冥澡斯物之格斯理之奧隨寓隨得靡間昏曉雲  
麓固夷石壁非峭目在而察炯炯獨燎有臨泰華或視  
以渺山豈不崇乃見之小扁亭者誰有揭斯表

耕甫歸書約信二字為別二首

水失其防一決莫止人心惟危殆亦若此曾子之守傳  
習在是以約失之益亦鮮矣

實之謂信言與行果言有不實自喪厥我誰其掩之不  
善已播人而無信不知其可

五言古詩

夏夜雲月不明有感

天色未清霽浮雲翳層空朦朧玉盤質髣髴擘絮中瓊

宇本瑩徹一髮不可容胡為受掩蓋萬象歸冥蒙誰能  
召風伯掃氛有餘功中天懸清光娟娟萬里同

病中和東里寺中作

陋質百不能補敗倚師友東里丈人行幸忝巾屨後君  
詩如秋霽峭絕森碧岫又如萬古壑潺湲瀉寒溜一手  
轉機軸四顧無匹偶明窓一披讀張膽不論斗願分有  
餘光屢辱自醉酒駑駘費剪拂鞭策誰可久徂暑變新  
涼一氣分六九逼仄塵區間蒸鬱未改舊心逐林泉佳



病滋面目醜起來強力貧寧敢繼富有

### 募兵

召募古來有今者何其艱文書急如雨取辦都保間百夫不當十一夫費千鍰恐被嗜利徒無能禦國患老母與少婦蓬頭走江干挽之不得留悲泣聲徹天母曰我壯子婦曰我健夫衣裳破無補田園荒未鋤一朝棄我去饑寒我何如我欲從汝行生死同一隅抑恐情軍氣累汝重汝辜今業已分離把袂畧須臾拭淚為汝言汝

亦無我虞戮力濟王功期以捐微軀

戊辰冬和湯南萬韻

號嬾老

我聞抱膝翁高卧南中廬方其未遇時邈若與世疎起  
來扶漢業肉骨成豐腴青簡萬世名寒窻一編書出處  
寧異轍此道誠非迂嬾老天下士被褐尚窮居負米供  
一飽晨昏擷園蔬自知身有待寧論食無魚博洽貫萬  
理收拾歸一途翰墨瀉三峽意氣橫九衢才大用寧小  
道肥身不臞勲名會有時天意非人圖璧玉藏名山抱

璞初不渝良工一顧盼光彩照路隅看君策駟馬願言  
刈其芻

春初走京華秋杪歸舊廬簡編廢已久開卷澁且疎誰  
能擊其蒙石田或可腴雁山有佳士讀盡天下書足跡  
半九州不憚道里迂陋邦何足臨而亦來我居相從一  
尊酒未厭園中蔬笑譚欣有合浩若縱壑魚人生惟所  
適所適各有途胸中苟不迷到處皆通衢簞瓢有真樂  
顏氏何其臞沒沒嗟我生未知終焉圖論交須論心所

論在不渝願君示一語令我反三隅君無金玉音請誦  
一束芻

十二月初六日栖嬾和方山

攜手喜初晴夜光列星漢栖嬾壁上圖昉於此乎看詩  
翁為抽思宮徵手自案一醉不敢辭斗膽破崖岸

送子謹叔

有序

子謹叔自幼與某兄弟游畧去位分相與論  
議反覆不厭間以杯酒為娛適不啻若朋友

交某之兄質純氣實志勤行端叔尤愛之重之  
而某實師之欲學之未能也不幸天降之孽  
奪之師而兄已下世矣不復見矣今叔又捨  
某而侍親數百里外異時蹤跡參差將不得  
為向日從游之樂叔以某之意為何如也叔  
嘗援手而謂之曰吾之行有以處子矣子何  
以贈我顧某嬰戚之餘志念剝落故學寢忘  
悵悵無一可道而眷焉惜別之語徒足以增

感愴者又不足以陳然其情抑有不能自己者漫成古詩五章蓋以平日所聞所知者而求正焉叔其一笑許之否乎叔之處我者昔聞其畧矣願聞其詳將終身誦之雖相去數百里外固不異於朝夕之面命也

古道日凋弊人心競險薄風雨晦朝暮平陸變溝壑歸來尋故廬六窓靜猶昨殷勤時拂拭埃塵易侵剝此地寬且明休哉有餘樂

大聖不可作立言百代尊開卷讀且想凜凜儼若存古  
今寧異轍豈徒資討論檢點作用處聖愚從此分記誦  
不足言為道忌多門

大雅久不作文士日以衆纘緝鬪新美靡靡相潰瀕春  
禽轉巧舌但可供好弄取之以終身隻字不可用古來  
名節人往往多樸重

少小從君遊忽已各壯年蒙銅未披發憂孽故熏煎羨  
君懷利器吾宗秀而賢刮摩盡結實涵揉歸本源聖處

猛自力人物方渺然

聚首日嬉戲胡乃遽言別回首十年間坐令肝膽裂東陽古佳地先民有遺烈為我一酹之山寒水清絕無以持贈君高秋千里月

送石宰

朔風攬長林凝冰對厚地人嗟行路難君行亦易易句金號巖邑日事紛萬蠅羣情一齟齬煩言四騰沸長吏不足嚴去之若下綈俯仰十年間轉足幾顛躓君材萬



斛鼎屹然國重器小試莅茲邑斬斬常正義百鍊剛莫  
奪豪猾斂手避惠人鄭之僞始亦遭怨詈三年輿誦聞  
人情見真偽君來整弊俗固有不得志抗之如不克浮  
言吁可畏論定要以久克終乃為貴謗讟變懽謠君政  
本不異字民有隱德動人皆實意嘉績今報成坐洗十  
年愧民俗豈相遠已治人亦治我本山澤臞強顏領一  
尉弱植媿匪材久矣辱大庇傾倒罄心腹撫愛殊醜類  
我亦為知己奔走常盡瘁君今造清朝行李挾佳氣我

方困塵役何以逃吏議世道就淺狹人心競功利俗子  
不足言志士或窘匱規摹與事業兩者畧相似願君恢  
宏綱大用見經緯江梅受命獨奇節凌顛屬折取歲寒  
枝摻袪以相遺此物君固有珍重調鼎味更須厚培植  
華實自根底

丁丑別金壇劉漫塘七首

黃綺避世翁萬乘輕商顏翻然為羽翼國本安泰山出  
處義與比盛衰世相關懷古誦考槃令人欲長歎

崇山鬱嵒我千章自交陰培塿植松柏斧斤日相尋物  
小固不容名大亦難任智哉甯夫子其愚非本心

北風吹夏律草木塵沙昏枝葉曾未害根本難具論肉  
食謀何有家食徒殷勤誰能起東山掃翳扶朝暾

川澤升為雨霈然周四郊有水行地中溉灌亦良勞勢  
力固有限憂哉加分毫為義分內耳誰言薄雲高

詞章道之華於世非少補施之匪其宜文繡被泥土自  
昔重立言一語萬鈞弩誰其厭來者是非實千古

女蘿去長松藉藉紛委地矇眊辭詔相十步九顛躓弱  
昧慙陋質先生未終棄再拜願有聞服膺敢失墜

人生玩歲月世事變朝暮三年在門墻一日泣岐路窻  
前長新綠生意自呈露願君曰強飯安排濟時具

喜雨

淒其望雲漢旱饑何頻年去歲秋後雨溝壑僅少年春  
耕問菑畲饑婦多嘉言夏耘喜優渥驛驛生翠煙不雨  
寧幾日已復憂虧愆傷弓慨心事過計乃不然風雷變

俄頃膚寸速九天夜坐聽傾倒朝起望渺綿時哉此甘  
靈不後亦不先我無負郭資墨突非所憐但願時豐登  
有粟均里廛歲晚稱壽觴一笑生春妍彼蒼其或者副  
此心拳拳拜賜盈百室敬誦良耜篇

己卯夏憂雨偶作

昨者憂不足今者厭有餘垂垂匝曉夕灑灑平澮渠苗  
事方用壯過潦非所虞但慮盈與虧理或相乘除它日  
儻望霓神眎俱墮虛造物願有終屯膏時其輸自此大

有年大書不一書飽飯樂田社一官徒區區

閑行溪西得梅數花喜甚偶成小詩呈諸趙兄  
作意每不偶邂逅與心會疇昔問寒梅李園不成醉今  
夕亦何夕見此萬花最獨立如高人凜凜塵世外藤蘚  
半侵剝風雪幾顛沛蕞爾籬落間勁氣奪松檜下視桃  
李場碌碌千百輩古淡不入眼何能供世嗜苦心抱歲  
寒天其知我矣此行得此花巍然為增氣置之几席間  
相對喜不寐有果碩不食明朝日南至芽蘖或未知爾

乃太蚤計三嗅味清絕令人發長喟

方山和篇再和韻

方山叔祖諱知仁字仁仲文公門人

方山詩寒梅吾故人歲必以文會沈墨尚可  
覆未知凡幾醉晚乃得此詩山靈以為最置  
身風月上出語色香外駕言孤絕處壞枝委  
顛沛懸崖折披竹斷澗強病檜窮交僅如此  
過是貌無輩碧眼苦好奇於焉有深嗜迎長  
得一花

一作失喜  
一陽花

以為時可矣遂若天下春

筆頭頓生氣我屬閉關日

一作我亦解事者

一枝偕

寤寐敢賀微陽來尚虞堅永至

一作目成良久之未知其

所至結束果何在飄零初不計政恐負歲寒或

為識者喟

慙慙里社間談笑文字會平生一尊酒無慮千百醉問  
梅窮澗岡樂事此其最風霜盡木末冰雪對戶外誰其  
念岑寂自得以顛沛歲寒二三友已不數蒼檜卓彼方  
山翁自許行偕輩古心味玄酒於世百不嗜少小誦佳



篇搜句亦奇矣年來久不作吾黨幾喪氣珠璧忽墮前  
疇昔曾夢寐三詠結束語坐令百感至來者恐未然往  
者非所計汗青幾名節徒起千載喟

方山有求轉語之作并用韻二章

方山詩孤根要先覺一花已後會而況萬香

中晚乃誇狂

一作劇

醉東皇兆羣物無物居其

最對梅欲著語當在梅之外君看龍蛇蟄中

有江河沛其元陽復雷其真歲寒檜於梅觀

此妙眼力憐湛輩無能根本求僅為香色嗜  
一元無識者孤真可知矣君獨邃玄機命筆  
一作筆力開風氣奇哉天根詞與世呼夢寐猶疑  
轉語下未為梅之至願聞第一義更作向上  
計會有先天翁當發無極喟

觀物非外索具眼以心會微陽花病槁寧供等閑醉我  
嘗課前作無言乃為最譬彼清廟瑟一唱弦越外萬卉  
染春色生意豈不沛何物漏天機一點映寒檜我欲屋

溪曲種竹十數輩疎影浸清淺作此苦淡嗜方山於此  
花論交亦久矣憔悴對冰雪中有益世氣向來多朋從  
痛飲忘夜寐舊事俱已非尚善詩押至俯就相唱酬殆  
為後來計一花未足多夫子亦何喟

四時冬復春造化一機會朔風空草木餘枿猶病醉梅花  
於其間居殿復居最三春在何許不在粉鬚外我嘗玩茲理  
若決江河沛永壑卧寒松雪嶺立老檜見命謂受獨落落一  
二輩有此不改節不與世同嗜抱貞開化元此花而已矣整

刷此精神寸草亦生氣嗟嗟迷復者膠輶隨寤寐萌蘖  
尋斧斤豈知七日至擊壤詠天根巧歷不能計持以印  
梅花無語獨歎喟

叔虎辱與予遊最久其所為詩文僅窺一二  
未獲搴珠壁之櫝而縱觀也行李來京都攜  
方崖類藁併續集示予暇日隱几讀之斲巧  
抽新絢綵爛爛為之洞心豁目不知君家所  
藏其富若是輒成古風以自詫竒觀因以為

謝

昔君遊我里諸老皆競爽今踰三十年百事一非往君  
今來京都相對各槁項清燈話疇昔未語意先惘橐中  
賸細帙挈來耀書檉枸虛列羣編金石振逸響又如春  
水闊穀瀾敷浩養繡鞏飫耳聞錦囊愜心賞今夕亦何  
夕塵塞為披敞吾衰亦久矣欲勉不可強尚記諸老言  
種收同鹵莽顧我困朝饑羨君富秋穰何日遂賦歸相  
從問隴畹滯穗儻可拾我亦歌擊壤

張上舍送望水偶成小詩

我家東南隅去海不踰咫  
乘潮厭厭鮮美望水快珍脆  
竭來雙溪上河魚僅青鯉  
泥滓漬膚肉強食輒三噉  
此物從何來對之驚且喜  
雖然餒敗質尚餘江海味  
令人憶故鄉沽酒為一醉

閑坐有感偶成古風簡劉會之高吉父康司理  
虞夏幾百載繼以周禮樂  
洋洋雅頌音後亡前亦作  
井疆貧富均薄海詠康樂  
姬公同聖賢積累亦不薄  
宜其

垂萬代整整守規覈寧知不數傳板蕩已非昨丘賦魯  
史書田疇鄭謗作滕君謾憂勤畢戰空唯諾盛古猶有  
憾此豈易商權矧今千載後而欲強復剝州縣工罟罟  
黔黎惴溝壑世道日澆訛禁厲不可縛我嘗三太息浮  
雲翳碧落為貧走塵埃豈解拯民瘼州家輕任使千鈞  
委羸惡勞瘁敢自愛恐負此邦託仁政安在哉名是意  
已錯治道去泰甚此論東州確人言寬一分所望恕且  
約一分寬未易十分擾已博嗟哉斯人生日巧亦日削

俗吏事朱墨暴吏事鞭扑我把七篇書人笑謂迂學誰  
與輸此懷濁浪渺垠堦

奉祀禮畢飲福有感偶成

憶昔少年日拜起隨父兄飯羹集隣里果粽羅豆登坐  
有白髮翁感歎或涕零我時百不解一飽追儕朋歲月  
忽已晚半生如飛霆鬢影吹秋風覽鏡良自驚父兄不  
可見黍稷恐非馨跪拜歲常禮苦淚空填膺呼兒共飲  
福百感心未平古今一俯仰生死同夢醒此去寧幾秋



况復較枯榮收淚且舉爵行行付交承

寬堂生辰見招坐中賦小詩為壽

人以寬而安道以寬而久蹄涔貯汗潢滿除翻覆手江海無津涯天地等大受寬故靜而一是謂仁者壽晴天泛風光春意入花柳一笑登公堂寬德寓杯酒愈寬則愈壽松柏歲寒友

別陳常簿墳五首

古道湮不續遺直聲以彰良藥見謂苦不試徒有方豈

其蓋世名可浣憂國腸視天方夢夢令人歌慨慷心理  
同一轍世學何多門倡徒各有植成性非兩存習之到  
聖處心小道自尊工夫未易熟毀譽何足論空言漫浩  
渺實行較分寸為官志何在監州民可問以此百紙忠  
解彼千里愠有守矧更賢往哉同令聞菜畦絕夜雨麥  
壠搖春風板輿奉歡笑意與物態同路才百里近水可  
一夕通君其戒徒御駕言無匆匆義交味逾淡心敬跡  
自疎球玉世所貴車馬人交趨性懶拙造請獨抱此區

區贈別我何有珍重千金軀

良月遊水樂

久矣聞水樂邂逅作此遊林立攢萬石曲逕穿深幽  
豁開古洞下有清淺流惜哉非古樂噴薄皆人謀流觴  
飲山綠風鬢吹颼颼欲歸興未盡攜手湖上樓斜陽獻  
萬狀浩以百目收白鳥去復還翩翩良自由我本山林  
人對此多慙羞歲月不我與宴閑其可偷便合作歸計  
老矣安所投世事皆漫爾政恐空白頭

送羅季能赴興國

句金與君別忽忽二十年君滋厲素節我已羞華顛轉  
物有玄機掃翳還青天羣耳共聳聽明詔方改元篤意  
召諸老高爵升衆賢執麾不可挽問君胡為然一氣纔  
作新萬卉皆爭妍雪霜誰謂無松柏良自堅操心不厭  
危知機常慮先承流惠疲氓調俗暢新絃送日徒京塵  
班春勝著鞭顧我足尚縻羨君翮方翩數里已云隔千  
里其可前有懷空感惻何時解拘攣卓哉漫塘翁邈在

雲山邊煩君招衡門為我致問言萬牛應莫回世事如  
風烟

湯南萬求詩贈別遂用其和韓總卿韻

清朝方振飭羣彥盡收攬萬化轉機軸一氣變舒慘歲  
寒天漠漠日暮雲澹澹古志可今覆遠考異近覽世味  
甘甜蜜國計未嘗膽驢技或易窮羊質徒大闕冒沒忘  
險塗吁嗟入玄窟志士抱忠篤封事寫憂懣已動凝前  
旒又隔充耳紃有獻非美芹有味真苦欖誰其鄙肉食

政恐忘饕餮一別幾十年重會生萬感舊歡痛莫追久  
交味逾淡羨君粲詞華綵霞生暮掩顧我已衰晚鬚雪  
羞髦鬣猛虎躍山谷寧甘落圈檻靈龜通鬼神肯自朶  
頤頷看彼宛上花何如澗下菴幽廬對江山逸興寄鉛  
槧我欲同君歸何由遂此敗茅茨勝金屋飯羹飽玉糝  
願言寄新詩春意起蓮茨

仲夏朔汰卒羣閤驚擾居民內外凜凜撫而賚  
之而後少定人情憂畏警夜愈嚴一夕霈雨羣

心頓甦張倅作喜雨詩見示因和其韻

居家多惰拙為國常隱憂有時發魯嘆乃或遭楚咻壞  
證至束手錯事皆從頭收汗挑怨憤作勞晚嬉遊變成  
生悍卒禍已延數州胡然近輦轂豈不聞高侯大決多  
所傷小安其可偷悍心未熨帖轉手即寇仇嗟哉逢不  
辰老矣何所投人力豈足恃天意或為謀連夕蒸雲霽  
崇朝洗歆燁巷陌收燥全河渠漲濁流仰首戴恩育歡  
心誰怨尤國步自茲穩吾志將何求高人贈我詩妙語

清於秋口誦殊未已頭痛頓已瘳欣然萬宇氣快以一  
筆收仁隣幸可卜舊好今自修願言為明時却顧思遠  
猷王度殊未飭人情過則休朽索難繫馬機心或驚鷗  
君方抱經濟我當歸樊丘

送趙寬堂二首

馬塍眩朱白孤山自疎影冰雪幾歲寒誰解為渠領李  
園百樹花人與凡木屏濕蘚回春風猿鶴并刷整為我  
一酌之往事莫重省



兩片南山雲偶爾連空飛一去向空谷一留伴殘暉招  
招浙江渡激激風吹衣仰頭有鴻鵠孰使心事違何時  
黃山邊把酒話昨非

送湯仲能國正以直言去國

朔風剪木末碩果懸孤危邈矣冥飛鴻異哉聞鳴鵠暮  
雲結愁陰送君江之湄去者挽莫留留者良自悲何當  
謝塵鞅鼓枻相追隨

花翁將歸婺女因為江西遊有長篇留別社中

次韻送之

曠士隘宇宙孰為君家山逸興渺湖海孰遣君意還胡  
然動行色便欲生慘顏新篇寫襟素和章就詞班亦念  
塵埃客肯照窻几間懷舊徒感愴搜語愧冥頑兩年重  
憂患悲涕不勝潸一身纏疾形骸頓已孱籲天凡幾  
疏無路扣九關望絕鍾鼎貴分甘茅衡跼蕭然一疲鴛  
不願十二閑送君為心折把酒慙量慳行行連京洛去  
去難追攀莫上八詠樓且宿雙溪灘為問赤松子世道

何其艱

靈峰

造物幻奇傑立石環堅城拔地數千尺變見百怪形兩  
夫屹當關左右排戈兵崛起萬古雄護此鐘鼓聲我來  
自塵寰一見心目驚把酒對此奇坐使世念輕明朝下  
山去此石留吾膺

雁蕩

東南富山水傑氣鍾雁峰巨靈排扇翬妙力開鴻濛斷

崖據險絕峭壁凌寒空分岑獻萬狀轉盼無一同或疊  
如錦纈或鑄如青銅或前如舞鳳或却如飛鴻或伏如  
卧虎或矯如游龍並如兄語弟差如兒對翁銳如筆露  
穎岐如剪開鋒二湫分大小二靈儼西東古語聊近似  
天巧難形容我久埋世埃幸此拔天風應接費耳目硯  
磊羅心胷有僧本儒家伴我追雲蹤攀躋不知勞指引  
殊未窮胡然便語別問之以涕從為渠游興盡生我歸  
意濃出計無草草回塗復恣恣還此未了緣邂逅須有

逢

送耕甫弟赴補

所性常存存危者惟人心子才秀吾宗一歆凡馬瘖俊  
快恐易蹶謹勿輕千金賢關集多士轡策方駸駸功名  
亦漫爾培護在資深我嘗評京華真是穢濁林繩約稍  
自寬一縱不可尋蚤夜念倚門翼翼如有臨亟歸慰慈  
抱母浪花邊吟

送夏肯父赴補

之子問行李策足游上都晚風吹客袂話別聊躊躇朝  
家渴多士璧水來英儒子志橫四海亦復隨羣趨磨勵  
強國策它時封狼居卓彼漫塘翁一壑老壯圖萬牛挽  
不前世事付長吁君欲訪隱所為問今何如

龔叔虎秋實堂

人心分內外學道謹趨捨巧令世所賢木訥人謂野至  
聖垂大訓夫豈欺我者陽和發天葩爛其映春筍一朝  
隨狂風殆不如土苴秋至萬寶成結束槁葉下一一抱

天根真理不容假持以薦豆籩潔誠神所嘏孔門德行  
科卓爾先游夏漢世躬行人未肯遜班馬照影空自妍  
心事形面赭美璞藏至用不琢存大雅詩篇匪君重閉  
戶自汎灑余言亦已多尚口不如啞

五八叔席上詠江梅水僊

難兄冰雪姿難弟金玉相一夷與一惠共此歲晚香凌  
波孤山下不染塵壒場故山尚無恙愈覺風味長夜闌  
更秉燭簷雪雪聲鏘鏘

雪中成十一韻

入冬多癘氣陽洩月令暢隱雷聲間作萬蟄驚塞向數  
日凝重陰雲同寒威壯飛瓊遍天宇色界鋪寶藏前此  
亦屢白玉瑞此其初絨運孰主張一雪壓千瘴紛紛富  
家兒羔酒醉金帳誰思道丐者雙脚紅玳樣顧我雖甚  
貧可挾尚有續蚤起願年豐共飽拜天貺天意然不然  
獨立為楚愴

園丁得二小花以獻坐中屬梅津龜翁賦之且



以寄處靜索詞仍有白戰寸鐵之禁自非不喫  
煙火誰解作此架空生活處靜詞先至梅津詩  
繼之皆清絕可味輒用梅津韻奉呈諸丈殆類  
癡人強絕粒未免又喫漿也一笑

歲功巧結束物與七反丹應嫌青女妒搖落空人寰耀  
釵雲髻裏點粉黛眉間香色亦幾何小有即大還艷陽  
費浮花微陽惜真韻月窟占奇芬天根關大分水雪又  
催年自此接新運泰華與秋毫巨細非定論

耕甫弟寄示秋懷二章冗不能皆和次韻後章  
謾見愛助之意

杜曲傳詩書百年植門戶汝少秀而賢中上期可語胡  
然織錦機未半已投杼謝彼遊冶徒前功尚可補墮身  
泥滓中起穢實自取細讀玉汝章此意可近古凡物甘  
以壞其成在堅苦要須心自鞭勿以言浪許它時觀厥  
成一笑相爾汝

中秋夜客退觀月謾成

檻外不數丈深窅藏丘壑壁月懸中天玉露下叢薄尺  
水澄秋光龜魚共予樂所樂亦伊何飲水良自覺恍若  
歸故山灑然謝羈絡明發將何之塵埃又如昨行也誰  
使之有此一大錯幸保寸心在舉頭問碧落

書于立齋自戒併示諸子

晦以昭明德怯以成勇功用拙巧莫尚持靜動攸宗惟  
柔養真剛自下升高崇虛可使實積小乃與大通守約  
博有歸味淡甘無窮萬里以是觀一心須自融戒哉驕

與盈外強中空空

登山述懷

拭淚別妻子登山望歸舟  
舟遠望不及巖溜鳴咿嚶足  
繭坐絕頂晚色忽已稠  
淒其杜宇聲問我胡為留  
撫襟獨浩嘆淚下不可收  
三年足別離此淚良有由  
區區駒隙中為形役不休為形役  
尚可為人役何求淵明獨何  
人我乃如拘囚親老方倚門  
甘旨誰供羞子幼未知學  
擇師誰與謀鬼蜮閃光怪  
虎豹嘯昏幽世路委叢棘  
吾

道若綴旒豈無知我者應謂我心憂

和劉會之野堂韻

草草春又過淒晦風雨夕三年烏傷夢不斷一區宅台  
山在何許空有塵滿屐英英江夏公老龍蟠古澤尋勝  
著幽宇搜竒列佳石可齋不出門亦復為渠役酒酣對  
崔嵬寸管凌千尺念我蕭寺中遠贈煩走力隱几讀妙  
句緬懷賓主席何當謝吏網足躡堂上客

詠芙蓉與菊花

秋光濃欲滴結束東籬花糝糝紛點綴戢戢相參差淵  
明太好事言樂酌流霞誰云制頽齡為與霜爭華映水  
開芙蓉麗色如春葩謾以拒為名青女不能加持此問  
淵明何乃各齒牙門外風如箭黃落滿天涯

再用韻

浮艷誇春苑貞耐還秋花有菊與芙蓉誰能分等差金  
藥含朝暉丹臉粲夕霞素商太冷淡歲晚生光華詩人  
抱幽獨東籬愛天葩可惜亭亭姿誤以脂粉加知音須

子期知味須易牙臨風慨千古雲海浩無涯

三用韻謝孫花翁趙寬堂趙貴方見和

金飈蕩天末清冷聚茲花凜然傲且拒霜天肩正差好事共一觀目眩五色霞但此慰寂寞那復矜榮華誰無蘭蕙姿誰無桃杏葩秋邊竟誰語短瓶插交加但知愛風味何必加齒牙未能輸一醉有興浩無涯

夜讀花翁詩什有感漫成鄙句拜呈藉以求教  
癡目駭見異寶揣摩贊歎徒犯古人銜嗤之戒

耳

士有當世志誰肯專詩名自古巧文字與道闕廢興傾  
座聽君語雄辨窮粗精目中無全牛肯察技未經胡為  
赴風月候蟲相與鳴靜夜誦佳什冷然如夢醒瘦語自  
腴澤險句自穩平譬彼有源水隨流作幽清奇抱歎皓  
首敗屋挑寒燈天運豈其然人力非所能我讀淵明詩  
悠悠千古情銜觴豈好飲采菊非餐英何時共臯益賡  
歌在虞庭



國正丈

黃則象  
名漢章

和章齊物之論掃去軌轍超然

形外所進高矣讀之敬歎不自揣再用前韻為

謝併以求教

鐘鼎非狗利山林非狗名古來豪傑士不待文王興得  
時舒氣馘宇宙生光精失時卷機軸圭華韜緯經神龍  
冬亦蟄蟋蟀秋乃鳴飲醇未同醉啜醕還獨醒泛觀疑  
自戾反視不失平人言惠與夷寧知和非清膏沃照幾  
室火傳非兩燈但使本根在毋誇知力能協一雖與理

不齊本物情聊借莊生語一吐胸中英看君鼓天翼事  
業揚帝庭

清獻集卷一

欽定四庫全書

清獻集卷二

宋 杜範 撰

七言古詩

和鄭府判韻

萬里扶搖整飛翮自是凌雲九霄客黃槐白紵秋風高  
借君彈壓添顏色奉檄校文真誤推多才視我蛭與夔  
竭力詎敢辭鈍遲寒芒在上方輝輝

次宗司法雲字韻

我來穀水償披雲秋堂靄靄生春薰落筆盤空鬪神  
速刮眼一破平生聞自笑黏繭日凭案抽思索句曾未半  
弱步何由附天驥肝膽輪囷慙寸管

和鄭府判秋闈行

秋雲黃日月忙登選才俊收詞章操觚搦翰換鍾鼎往  
往冰炭交中腸柯山多士稱海內勇氣洗盡古戰場笑  
揮筆陣示整暇灑灑胸中書傳香此邦昔日龍頭客前  
後相輝九霄翮山川孕秀不乏人想已津津動顏色題

與左嶽得儒英行整速步趨天庭金薤琳瑯耀光彩不  
學砌下寒蛩鳴蓋世功名人共許赤手欲搏南山虎  
斲來秋院鎮文場坐使千袍同鼓舞我昔貧困如匡衡隣  
燈夜照心崢嶸區區薄宦亦謾爾役役塵埃愧此生淺  
學幽深雖未燭到耳獨能辨絲竹從今著意聽文鳴會  
使嚶嚶出幽谷

又和鄭府判韻

荆璞照耀非常珍天衢整步凌通津與人軒闕破畦畛

滿懷拍拍無非春我如樗驢異遠道志在千里身未到  
竭來此地尋文盟平生心事為傾倒飽德醉義樂有餘  
况有蘭玉芬庭除諧笑云云殊未厭盤飧夜半勞兵厨  
依依此情那忍去自恨塵鞍難久駐佇看飛詔自天來  
殿前賸作摩空賦

漢中行

思昔漢中殆倣擾自荒遐驅侵警邊陲烟氛闇華國官  
守既蒙塵宮廟入異域姦回執國命地土輕棄擲倒懸

頭足互霾昏日月黑念之不忍言之淚沾臆壽皇雄  
武姿一洗曾莫得祖宗固有靈何以重此感忠賢固有  
心何以久阻抑忍恥坐薪亦幾年生聚教訓亦纖悉昨  
者飛詔天上來積穢坐欲一朝滌忘形感憤泣東南氣  
生果銳吞西北似聞元戎已啟行官軍所到無勍敵倒  
戈橫尸四十里塞旗獲馬六千匹長安遺老今尚在壺  
漿筐篚輸悃懃勇威義氣有如此鼎魚鬪沸真假息事  
雖未必合所聞要之天地當開闢池魚一日羊角上此

理從來有通塞世人信古不信今動把國事作嘲赦胡  
慚不念涵煦恩坐看行人鬪道側嗟予少小則古昔有  
志未就苦弱植茅簷獨對參斗橫百感交情節屢擊勇  
兒出世豈無為七尺非供螻蟻食當年幕庭三誦人乃  
有洙泗詩禮客豈作今人蠹簡編琢腎雕肝緝文墨干  
戈社稷不入用有作以糜煮砂礫我欲匹馬馳雲中直  
指燕山以功勒

黃兄字出示湯丈追和春日詩適有會余情者



次韻

君不見西山凜凜百世師，忍窮受餓終采薇。  
又不見醜謬遺臭幾千載，當年方丈厭肥滑。  
孰得孰失試大觀，較若五味辨甘辣。  
冶容媚世吁可憐，羞面顧影自塗抹。  
名利物我爭錙銖，語笑詡詡已衷甲。  
方嗟天際暮雲深，還見墻陰春草茁。  
旨哉君詩良起予，重把心事為君說。  
百年功名亦漫爾，塵路投蹤何日脫。

再次沈節推送春韻

子規泣訴春山頭芳草連天不盡愁紫陌遊人在何處  
空有顰眉人倚樓溪上悠悠棹木蘭溪邊落紅紛紛斑斑  
嗟哉片片逐流水新篁忽長千琅玕多少閑愁推不去  
欲問春歸杳無處少年知己負心期尊酒從今樂事稀  
歸自明遠醉中作

觴豆論交今豈無肺肝相與古來少我今宦游雙溪上  
一見為僚盡傾倒吏塵終日何沒沒休澣有盟方皦皦  
點檢春事今幾何殘紅滿地紛不掃明遠奇觀雄此邦

倚欄一望雲縹緲潑眼爭光堤面流傷心不盡天涯草  
文楸得失亦漫爾投壺成敗供一笑酒酣耳熱聲烏烏  
語到難言心悄悄有言及時事者一切置之姑勿道四時風月  
殊未了鬢華知復為誰老我輩心事要論討尚喜後會  
今有期誰其識之有鷗鳥

### 七夕歌

象緯昭垂各度纏牛女之說從何年博物有志張茂先  
客槎親見織與牽坐令千載習繆傳遂將濁欲穢清玄

詩史實錄百世賢亦以俚語形歌篇君不見昭陽夜靜  
玉欄邊誰知漁陽萬騎橫戈鋌何如鳳簫縹緲縵山巔  
舉手辭世乘雲駟我欲浩歌痛飲秋風前仰視星斗奕  
奕紛羅駢安得壯士橫笛一聲吹上徹九天

詹世顯老丈春米為贈時有張老之子携其父  
詩求月助即以詹米轉饋之詹丈以詩送米和  
其詩

歸來兩見春載耜老矣陳人愧髦士書生活計常若拙

瓶粟屢空固其理石莊好義無不為獨將飽腹念朝饑  
擔石負肩米叩戶要轉兒啼成歡嬉此賜何敢望此老  
况有新詩非草草再拜為之驚且慙錦章玉粲鬪新好  
我貧猶有稻梁謀更有貧士需麥舟為君乞與君然否  
樂施曷計誰家留

五言律詩

新秋

大火西流日秋風戶到時斷痕依淺水疊翠別高枝氣

每隨時改人應共物姜百年同一夢身後欲何為

電

玉女開天笑驪龍弄月珠照眸千壑滿應手一絲無掩  
映同雲表行移轉海隅田夫占北極明日雨平鋪

和澧州喜雨韻

秋色在何許浮嵐疊翠間江清雙鳥渡天濶片雲閑雅  
量肩文舉新詩壓子山更深聽遠溜哦詠荅濺濺

十五日十九兄到家小飲有詩和之

晚色煙霞好寒山雪月明賞心聞鵲喜醉臉任狸形銀

燭輝蓬戶冰花爍膽瓶讀君斷腸句孤雁欲吞聲

十九末

章云鶯鳴  
求友聲

是夜聞十六兄雪中有作次韻

晚山樓半白晚岫勒斜紅草草三杯裏悠悠一笑中喜  
君才磊砢顧我意蒙茸伯仲壘麓處空嗟不與同

次鄭府判金字韻

巖嶇來北固邂逅識南金未覺人間役欣同物外燈

花殘夜半桂子落秋深細聽朱絃曲寥寥大雅音

和十四兄靈巖偶作

松關開野寺山色淨藜牀戰局誰爭勝夸聲或大當有  
人觀物靜得句滿囊香鷗鷺盟猶在閑中作此忙

次會再和

古殿後多竹虛簷前可牀炎歎於此却曾次要人當自  
足蕭蕭意時來細細香曲肱無一事閑為屬詩忙

和十九兄梅韻二首



空谷寒花好荒村野路長有懷尋往事無語攪枯腸老  
氣猶無恙幽姿只自香喜君歌白雪茂對此新陽  
語別星霜久懷人道里長江山高著眼文字飽撐腸窮  
壑生新態寒梅帶舊香它年當記憶有雁過衡陽

九月二十六日觀水

滔滔隨岫遠澶澶浸沙寒萬古去不極幾人來此看放  
乎知有本逝者若為難瞪目斜陽裏雙鷗下碧瀾

道傍見梅

金苑八人三  
卷二  
一樹棲殘雪不禁春夜霜香飄非寶篆粉褪厭時粧且  
合收餘白應難待晚黃自便籬落好榛棘不相妨

別宛陵同官

遊宦見交情惟憂間易生文書祇自了意氣若為傾幸  
已符金斷終然為玉成官僚有如此共保歲寒盟

途中

官身驚昨夢山店是回程郡事關新舊人心屬送迎塵  
衫纔幸脫野服要須成世路如川險歸途却自平

有感

捧檄來茲邑勞勞兩載餘  
親庭千里隔家信十分疎  
有婦聞多病諸兒盡廢書  
低簷秋雨滴點點正愁予

和楊兄五言二首

羈栖餘兩載塵擾費三思  
愧匪江陵掾空多東野詩  
佩囊無限富擊鉢已嫌遲  
細讀停雲句多應負所期

納履終朝役挑燈獨夜思  
功名非我事風月負君詩  
菽水謀多拙山林計未遲  
江村梅正好珍重歲寒期

趙山甫居玉壺盡得湖山之勝醉後和其韻二

章

占盡春光好湖山一覽餘著身蓬島裏縱目畫屏如我  
計還知錯君謀定不疎它年同到此卜築莫躊躇

相見雖無幾相觀却有餘清襟無這樣塵世有誰如文  
理須教密濃醺且放疎論文何日再欲別更躊躇

舟早行將至三界偶成

辭京塵漸遠入越思逾清雨壑溪方漲風帆去又輕天

光浮水濶山色帶雲橫更問鄉關路從今尚幾程

捉筆次前韻

小雨添溪滑新晴散野清寸襟如水濶一漿共雲輕坦道皆直縈縈徑自橫天衢從此卜何用問前程

再次前韻

晨炊浮早渡午夜過錢清越國移舟便曹娥上堰輕人言三界近共指一山橫古剎明朝到籃輿數去程

再次前韻

厭見塵泥汨喜看沙水清魚攢偎日暖鷗去帖波輕寒  
渡人來少閑舟岸與橫不須催去槩溪曲不論程

和孫司門寄寬堂詩

二首孫尋訪梅約還  
淵明詩有兼簡之語

官喜文書少塵迷歲月遷豈無車可出儻有約宜堅傍  
水尋疎影裁詩續舊編孤山須竟日去莫買游船

靖節非沉湎行藏豈漫遊幾多經濟具可付醉吟休志  
在存周鼎悲能學楚囚流風千載想我欲賦登樓

和吳準齋所贗劉石澗詠湖山之樂因見示韻

勝賞付飛觴詩人妙嚼芳荷君相拔拭容我共清涼湛  
俗人空老偷閑策最長高峯應更好何日曳枕榔

戲賦段橋風箏

段橋牽紙鷁兒戲亦關心風快應難挽雲高徑欲侵人  
誇無限力身直不多金說與須知道明朝不似今

水簾谷

淨月

維摩室

新月谷

巨崖森四立研洞費前瞻鳥道穿危磴虬松奮老髯巖  
高全似砌水小不成簾半生纔此見雖倦未應嫌

賦夏肯父所性堂

心外非吾有區間忝爾生道原無欠剩物與共流行繩  
甕誰言辱旂常未足榮反躬深體認莫浪付詩情

酬謝韓仲和見贈

丹心空自照白首欲何成踏地方求實箋天敢為名樹  
深秋水淨山遠暮雲輕索我文書外論交深友生

挽王侍郎二首

地靈鍾國秀臚唱壓時名虎觀堅廉節螭坳振直聲志



隨時暫鬱身與道俱榮人羨腰金日於公孰重輕

里粉敷陰樾畫繡借輝光誘接嘗登席樞趨屢負牆故  
山欣弭節華屋痛帷堂歲晚凋松柏令人重慨傷

挽鍾保義

周岐山  
為之求

賓館名猶在燕山事有光解衣非楚纊指廩異齊棠映  
日庭蘭蔚餘風宰木香翠珉垂世勸寧復事雕章

挽劉監丞二首

諸老凋零盡公胡不少留塵談裁後進山立儼前脩逸

館休黃髮為邦付黑頭甌閩看蔽芾有淚正難收  
奕世詩書遠三劉姓字香鄉評高宿望里社借餘光蓮  
浦秋堂晚松岡夜室長典刑無復見南望獨淒涼

挽葉子儀二首

性質孰無偏工夫豈易鐫人誰知此學我獨謂公賢耿  
耿存憂世悠悠付逝川一經端有屬拭目看家傳  
當年共短檠心事熟論評豈我非同志於公不用情幾  
多才莫試有此恨難平舊友凋零盡悲哉伐木聲

挽項監鎮

男兒志四方世事苦難量蚤逐功名誤空令歲月荒倦  
遊歸故里幽興肯新堂當日多知己諸公孰在亡

太師平章喬文惠公挽歌詞三首

奕世諸賢輔清朝得老成諫兵秦塞叔憂國漢蕭生更  
化人皆仰調元位獨亨天遲諸葛死尚欲致昇平

名在洪鈞上身遊綠野中社方娛白傅城遽閉滕公國  
勢闕輕重君恩著始終堪嗟典刑盡羣木刺寒空

憶在烏傷日驚騰鷄薦辭自憐拘法守何以答心知零  
露黃花暗淒風畫翬悲遙瞻孔山路無計送靈輶

挽周迪功二首

書種開風氣儒聲動海涯一門團義聚千里擇名師重  
卦終須卜留耕已可留賢書初入貢玉樹影參差

憶昔癡兒幸聯君季氏姻兩家成契濶一夢記酸辛鄉  
譽聞君子銘章又古人落花愁暮雨淒冷不成春

挽張監丞

我兄同昔席我亦接青班不盡明時用空令老淚潛筍  
聯纔胄監竹使只鄉關時豈無知己吁嗟世路難

挽趙漕二首

蔚蔚郎闈望皇皇使節輝競時俱勇往懷寶獨言歸皂  
蓋人方惜黃梁夢已非蕭山遺老在誰使涕交揮  
歛衽從童叟巢枝幸里閭塵蹤誰拭拭餘論借吹噓得  
意鳴珂地驚嗟素錦車直言公不死蘭玉秀階除

趙學士挽詩

鼎盛彈冠地胡然袖手居自怡還自足誰毀又誰譽花  
竹人安在芸蘭慶有餘華塗驚素錦行道盡欷歔

挽陳漢英

庠塾崇師道鄉閭重典刑麟經開晚學鶚表動天庭頭  
未終朝黑衫能幾日青文章難得力愁絕峴山瑩

清獻集卷二

欽定四庫全書

集部

清獻集卷五

五

詳校官庶吉士

臣瑚圖禮

主事

臣

呂雲棟覆勘

覆校官博士

臣

劉光第

校對官原任中書

臣

徐步雲

謄錄監生

臣

沈安邦

欽定四庫全書

清獻集卷三

宋 杜範 撰

七言律詩

新秋二首

少昊行秋正疾驅  
灑然涼色已侵膚  
翠空碧水涵高下  
淡靄蒼煙半有無  
風露已經生慘戚  
菰蒲且欲慰斯須  
誰將霜竹橫雲外  
似有悲聲與恨俱

一葉階前落淺黃  
已知秋色渡長江  
百骸假合寧長健



萬慮叢生未肯降  
荒草露寒飛蝶盡  
暮山煙帶白鷗雙  
倚欄獨立渾無語  
時把殘篇對小窗

春雨甲子而潤澤不違時  
夏已更秋方慮乾涸  
一夕沛然優渥矣  
喜而寫情

甲子謠言未足聽  
沛然甘澤以時行  
平田不藉開渠水  
野老誰思逐婦聲  
黃倒積雲承露重  
青翻長浪簸風輕  
賤夫一飽誠為幸  
更祝傾河灑甲兵

繼和嚴君壁上韻

山舍棖楹朽蠹餘竭來小圃作閑居推移寧免人間世  
灑落還同心地初鷗鷺齊盟忘物我薜蘿交翠映簪裾  
恭惟不負傳心印已把浮生付六如

丁卯九月十夜觀月

草露團團夜氣濃一天明月半彎弓光涵萬頃澄秋霽  
影落千山接翠空毫髮不迷孤照處膽肝盡露廣寒宮  
回廊獨步渾無覺似是冷然駕遠風

己巳登玉峯亭二首

與君攜手上巒坡多少塵襟盡刮磨一鳥橫邊秋靄淡  
片雲歸處夕陽多潮來萬里翻明練山簇千峯列翠螺  
此地不堪歸去早欠看明月漲金波

杖藜無事歷危坡一片清寒鏡面磨極目盡時知水濶  
置身高處見秋多此時不著登山屐到處還成測海螺  
遙想高人閑物外故應不與世同波

八月十一夜風月可愛自前屋覓酒不得而歸

小詩呈百六十叔

晚煙輕拂亂山橫  
落日纔收月已明  
萬頃孤光低濶野  
一天寒色帶疎星  
交情要與秋容淡  
攜手難禁夜氣清  
慣識醉中風月好  
不知風月更宜醒

次韻草堂

心事崔嵬日不如  
愁端叢起蔓難圖  
殘山剩水鳥聲怨  
落日微雲雁影孤  
妙句聳聞驚昨夢  
寒窓細讀慰來蘇  
許身已在羲皇上  
降志猶能念昔吾

偶屬成嵬字韻錄呈六十叔二首

溪頭徙倚對崔嵬世上塵愁安在哉峭壁千尋翻素練  
深崖萬古闢雄雷空餘鳥跡無人到應有山靈怪我來  
偶爾相逢成勝槩平生襟抱此中開

莫令胷次著崔嵬萬事於人何有哉欲向懸崖看積雨  
幾經空谷撼奔雷山花無思開還落溪鳥忘機去復來  
此地逍遙吾足矣解愁春甕不須開

清真褚道士攜羅丈唱和訪余求詩予非能詩  
者辭不獲力拙次韻能不以狂斐疵我否

遠尋幽侶對清閑  
落筆煙霞寫壯觀  
不染紅塵隨處適  
獨將青眼箇中看  
雲飛碧落無心到  
月浸清波徹底寒  
遙想銜杯當日意  
灑然新沐欲彈冠

和宗司法與鄭府判韻

毫端收盡九秋清  
凡目容窺巨海驚  
別駕錦囊誇李賀  
參軍石鼎續明珠  
璣錯落交輝映  
金石鏗鏘迭奏成  
迷道願君相指似  
敢辭驚鈍策孤征

又用韻

候虫嘖嘖泣秋清節物還令壯士驚人在九原誰可作  
月橫千里自增明詩壇尚幸從盟約句法于今識老成  
自愧枯腸如罄室只愁有債未寬征

又和鄭府判侯字韻

野人漫學事王侯宦牒相從得俊遊著眼丹鉛常午夜  
轉頭萸菊已深秋幾多陳迹成今古莫對清尊話去留  
自幸趨隅陪玉麈如今何止識荊州

復用韻以見別情

插架牙籤富鄴侯  
戲將翰墨此中遊  
紫萸黃菊家家酒  
巨軸長篇字字秋  
談笑不堪增戀繆  
簡書無奈怕淹留  
人生聚散真萍梗  
咫尺應能見九州

別張簿兄弟

弱柳含風拂路隅  
一尊話別意躊躇  
相看未了百年事  
有約無忘千里書  
到手功名還漫浪  
褪身德業念居諸  
願君一語勤相贈  
拜賜從今儻不虛

戊寅夏和趙十七兄招提偶作



故山攜手愜心期里社從遊即舊規  
十雨五風深望歲一尊重會只催詩  
多君格力開壇社得句精神見睫眉  
匹馬秋風思遠道此盟常恐憶它時

遊擘翠

新晴山色淨襟裾世上塵埃一點無  
飛瀑驚奔爭瀕洞層崖屹立鎮崢嶸  
亂流平處沙可數頑石叢中草不枯  
醉後偶來觀物變要知到處是工夫

和沈節推韻

點檢春光向幾多埋頭官事暗中過  
蕭蕭鬢影霜先入  
匝匝襟塵鏡未磨  
盟會誰令寒晉楚  
篇詞自幸識陰何  
休文多病風流甚  
紅藥尊前獨醉歌

次陳友韻

永嘉人葉  
交代館客

企望隣邦百里賒  
一時文物數名家  
驚人議論鏗蒼佩  
落筆詞章粲彩霞  
此日相逢真有幸  
何年重會恐無涯  
顧余何以為君別  
多愧新詩屢拜嘉

歸自漕司試院到桐廬晚偶成

歸棹便風沂古流一杯獨酌興悠悠夕陽蘸水金窩沸  
暮靄籠山紫幕浮牧笛村村分路入漁帆浦浦帶煙收  
丹青此處難為手更有羈情不奈秋

再依韻復足五十六字以見一時無聊之態非  
詩也

人間總是一虛空過眼流光過耳風方見露芽墻下茁  
又嗟霜葉嶺頭紅身來作吏雙溪上誰使衝寒一寺中  
急雪隨風穿瓦過強呵凍手作詩窮

十二月初六日出郊途中值雪偶成小律詩

宦塵役役走長塗歲晚離家只自吁  
風入破輿寒徹骨雪穿疎幌亂沾鬚  
橫陳瑞色今如許定擬豐年可大書  
州縣徒勞何敢憚萬家溫飽即吾廬

恭謝侍讀仁皇訓典徹章御賜杜工部紫宸殿  
詩退朝口號并鞍馬香茶

於赫仁皇訓典垂寬慈實德太平基  
鴻圖植遠文孫紹燕翼謀深烈祖貽  
寶厯初更思善治瑤編久閱撫良規

平平王道今猶昔海宇雍熙庶可期

丹地從容接細氈豈徒口耳漫周旋帝王家法由心法  
典策言傳以道傳章徹誦筵天意悅恩隆賜典露華  
鮮禮文稽古皆成憲主德由斯志罔愆

微臣何幸廁經帷寵渥便蕃亦例施鸞鳳驚飛高晉帖  
夔龍會送借唐詩靈蕪甘露排憂困駿馬雕鞍念老羸  
自愧無功難稱塞孤臣耿耿只天知

得雪稱賀馬上得五十六字

昨夜同雲猶未合曉來一色變山河料應天上梅花早  
吹落人間柳絮多酒興自憐今老矣詩腸無奈此情何  
銀杯逐馬天階路何似寒江伴釣蓑

窻前竹

拔地停空翠削成與凡草木不同榮無心到彼難教曲  
有節防身只自清本是孤根穿草壤誰令弱杪上雲程  
礙簷敲瓦宜芟去好伴寒松澗壑聲

聞喜宴和御詩

臣恭覩御製賜徐儼夫以下詩仰見陛下菁  
莪樂育棧樸能觀君子有酒旨且多爰啟雲  
需之宴治世之音安以樂載頒奎畫之華臣  
昔廁職於摛羅今饗恩於慈惠不揣荒蕪恭  
和投進伏望聖慈頻垂睿覽冒犯天威臣無  
任震越恐懼之至

清朝策士屬新元四海英髦意氣軒自是冕旒崇直道  
亦令韋布效忠言鹿革初洽君恩重鳳藻俄頒帝語溫

此日微臣陪鎬宴更慙蘭省濫搜掄

舟中偶成小詩

泛溪深處暮山晴乍脫塵埃耳目醒  
水面浮天相與碧波心浸月兩爭明  
淺流礙石灘灘急曲岸鋪沙渚渚清  
人靜夜闌舟未艤微吟顧影不勝情

和楊兄兩詩

魯教寂寥鄒辨已異端塞路日殷繁  
寶絲遠緝千年緒古鑑新磨一世昏  
正道以身為屏翰真儒於此見淵源



緘來遺像知君意百世師模儼若存

楊以昌黎  
像見贈

望斷家山兩地懸白雲何處涕潸然吏塵歲月知無幾  
宦海風濤幸有邊已是雪霜催歲晚又還花柳放春妍  
起予妙語令深省碧眼相看話百年

準齋誨人疊疊不倦某每侍几席灑然若執熱  
之濯清風一日語及唱和新篇繼復緘示聯章  
巨軸皆相與切磋之意某輒忘其荒陋次韻二  
章借以求教不敢言詩也幸赦不敏而鐫誨之

著身鬧市歟惟艱渺渺狂瀾蕩不還心莫轉移真匪石  
德常安重有如山談經不踵諸儒後辨理尤嚴一字間  
傾耳名言深猛省半生日月總成閑

倦游愈覺世途艱遠矣淳風未易還車去出門多異轍  
塵來眯目失前山差殊只在毫釐際迷復都來反覆間  
珍重先生相指似忙中自有本來閑

伏蒙賜和復用韻二章拜呈可謂出醜銜媿惟  
自叙鄙懷併以見區區敬慕之意姑惟教之是

所願也

道在行藏自古艱為貧偶出未能還一從舉手遮西日  
已恐移文在北山身入微官韁鎖裏心慚大隱市朝間  
浮雲富貴非吾事便有功名亦等閑

學道辛勤歷萬艱精神見性本無還齊眉自可供瓢樂  
攜手何須去鹿山謂介謂通非所在不夷不惠處其間  
自憐塵俗心猶在即席摳衣願少閑

和花翁盆梅

絕澗移來近市園又還移入賣花盆體蟠一簇皆心匠  
膚裂千梢尚手痕試問低回隨俗態何如峭直抱孤根  
歲寒風節應無恙曾兀須知自有尊

和花翁自詠

愚拙天真未易全如翁自許豈其然剩將詩句酬花債  
只把春衣辦酒錢僅六尺牀皆樂地方千里旱自豐年  
瞿曇老子都曾學曾學為儒也學仙

和貴方韻

萬物由來備一身要教純熟在持循莫嫌惡濁浮埃界  
自做分明實地人培養確知心是聖工夫豈費筆如神  
羨君精進追前哲愧我衰頽落世塵

借韻呈寬堂

坦然寬德是居身又有疲忙要拊循鏡淨不過方寸地  
海涵何止百千人呻吟望賜多溝壑晚閃為霖幾怪神  
膏澤未能周海宇祝公先靜一州塵

次花翁冬日三詩

料理新陽在此朝休文但覺帶寬腰懶將漫刺巡門到  
病怕時人舉酒邀強裹青衫空自累滿簪白髮不相饒  
冥心久矣隨天付九轉還丹不用燒

人心天理兩相關無奈花翁盡日閑麗服靚粧紛拜節  
弊衣短策自怡顏已聞瞥爾尋幽去又見陶然向市還  
住世世塵塵不染梅花好處即孤山

翛然僧舍一柴扉淡泊如君眼底稀山澤肯為仙骨瘦  
襟懷自得遜身肥有詩盈帙遮空素無酒留賓辦典衣

一棹稽山風雪裏便應興盡雪中歸

聞欲往越上故云

次花翁喜雪快晴韻

何人急急走靈符扶醒縱縱十萬夫隘巷未收穿履迹  
短簷已倚曬書儒日開雪色如翻手景屬詩家費撚鬚  
起望四山新入畫翠屏半是粉成圖

次花翁第二雪

創見飛瓊粲晚華已聞得句壓劉叉亂隨風勢斜穿戶  
誰在雲端巧雨去聲花惱殺饑鳥尋屋角寒驚宿雁失汀

沙此時清絕難酬賞  
羔酒誰言勝鳳茶

次花翁第三雪

擁衾無事可相干  
急報飛瓊急起看  
推戶已成千頃白  
倚欄未覺十分寒  
三逢瑞景開心目  
幾費詩翁琢腎肝  
妙句鼎來方對客  
共吟驚喜欲忘餐

次花翁自笑韻

村翁活計謝田莊  
肯與時人較短長  
餘事詩篇陵鮑謝  
太平胷次到黃唐  
以通為隱渾無礙  
有樂償貧似畧當



自笑此生成鵲突誰知鵲突正難量

次趙貴方九里松獨行韻

道機已熟絕防閑縱步來尋興裏山殘雪點衣消酒醉  
晚風吹鬢帶詩還妙年羨子歡悰足走宦愁予樂事慳  
安得相從塵網外快將如意碎青珊

羅季能赴興國前詩未作嘗於醉中謾成亦併  
達之

一笑重逢二十年自憐鏡影已華顛謾言世上誰知我

落在人間恐愧天理到平時無一事行須實處著千鞭  
但教千里民安樂莫使虛名為世傳

又送湯國正五十六字

一尊濁酒送君行慘澹江雲似我情已是園林堆落葉  
更添風雨掃殘英直存吾道曾何病公在人心為不平  
我久念歸歸未得羨君趨得去帆輕

南鄉舟中偶成

日斜遠浦闕朱光煙抹前山濕翠粧自有著身丘壑分

故應遣我水雲鄉便於世上誇鍾鼎何似田間飽稻粱  
手把黃花相問訊秋風不改舊時香

和耕甫弟梅

數點冰葩與雪宜有人著眼水邊籬從渠疎影初傳句  
自此清吟未有詩曾到孤山飛鶴處恰思偃樹跨鯨時  
李園莫負春風約應有當年未折枝

冬至展墓偶成

至日衝寒掃墓墟淒然一拜一歎歔蓼莪恨與雲無際

常棣愁催雪滿裾  
誤落世塵驚日月  
謾牽吏鞅廢詩書  
回頭更看諸兒姪  
門戶支撐正要渠

鄭寧夫攜詩什訪余併有贈篇聞其浙右之行  
詩以送

何人剝啄扣雲闕  
袖有新詩數百篇  
宮徵自調相和應  
珠璣不揀盡光圓  
昌黎薦士慙無路  
東野盤空枉笑天  
聞道二親猶未葬  
知誰著眼為渠憐

承見再和用韻

簇簇枝頭綴淺黃，鼻通四遠熟留藏。  
秋於對樹疑添色，雨不多時怕減香。  
花事索人非易管，詩情得酒為新嘗。  
叢芳德色驚人句，影下重吟駐夕陽。

一本云乞將花事從君管，賸有詩情

得酒嘗推按已驚新什至謫如病思得春陽

挽曹處士二首

年纔四十未云遲，勇謝文場意已奇。  
獨抱古心欣有得，肯同時好浪相追。  
迴神自是平生學，徹底還看處死時。  
援筆大書真力士，紛紛醉夢若纏悲。

持身非介亦非通閑處工夫不墮空石室隱居雖我獨  
鳳岡文社與人同道鐫一族多名士惠決千家有後功  
潛德自昭何待發矧茲大筆詔無窮

徐倅尊人挽詩二首

教子成名豈偶然存心積善契蒼天獨工學問馳清譽  
旁習陰陽得異傳煞有哀榮身後事不差生死夢中言  
欲占厚德看銘誌七十之期過一年

論子論交事契深同年同里又同心登堂未展龐公拜

夢奠俄驚尼父吟自古陰功天所予如公遐福世同歆  
老成漸漸凋零盡空有潸然淚滿襟

丘知府挽詩

弟兄鼎譽人爭羨富貴隨時報未均  
領閣清班非不遇持麾重選遽成塵  
世誇人物今何在志在詩書竟莫伸  
笑語詎諧猶在耳忽聞遠訃恐非真

挽陳將仕

事到蓋棺方始定言于陋巷乃為公  
試看傾郭盈襟淚

盡是忘餐振廩功榮貴但知崇已欲文章未必濟民窮  
如君厚積人誰忌惟恐君家積未豐

挽黃脩職

居仁  
尊人

宰士當年棣萼情世科心許白頭登詩書早已傳家學  
塲屋誰知負夜燈老矣尚餘英氣在嗟哉獨慕善人稱  
一經分付曾何憾看取于門自此興

挽李處士

确犖羣山兀海隅芬川蔚有吉人居施仁一念周鄉井



稱善同聲溢里閭教子垂芳心有待榮親養老意何如  
貽恩漫爾撐門戶肯負當年一束書

挽趙漕閤中

丘公四海大名垂有女來嬪閭閱宜蘋藻自供寒女事  
琴書未許世人知舟移夜壑方遺恨劍合平津自有時  
膝上一經勲已策吁嗟不賦板輿詞

挽闕

韜光自古常難見友道于今幸可論勲業但看江左相

才名已識下邳門，壯哉蘭若當時志已矣。雲山此日原  
到底百年同一夢，山林鐘鼎尚何言。

挽翟親

時運遭逢亦偶然，著鞭莫訝祖生先。閉門終負三冬用，  
脂篋徒誇十部賢。玉樹幸能光舊德，爵羅寧復歎當年。  
生平未快荊州願，有淚空令落九泉。

五言絕句

酥溪寺舍窗前有黃金間壁玉竹可愛謾作二

十字不許撞題

中土太淡素東皇染半節此君已不羣此種更奇絕

得光字

掛起梧桐月先成一夜霜與君飛大白一口吸秋光

清獻集卷三